



PERUTUSAN PENGGERUSI

PERUTUSAN Pengerusi



“
Meskipun
ketidaktentuan
pasaran global
dan halangan
meningkat,
pasaran modal
Malaysia kekal
berdaya tahan
pada 2022, dengan
jumlah dana
yang diperoleh
mencecah RM179.4
bilion.”

Selaku Pengerusi Suruhanjaya Sekuriti Malaysia (SC), saya dengan sukacitanya membentangkan Laporan Tahunan SC untuk 2022.

Pasaran modal Malaysia yang bernilai RM3.6 trilion kekal berdaya tahan pada 2022, disamping ketidaktentuan pasaran global yang semakin meningkat dan halangan mencabar merentasi pelbagai kelas aset. Malah, jumlah dana yang diperoleh bernilai RM179.4 bilion adalah yang tertinggi dicatatkan, diterajui oleh jumlah rekod terbitan bon korporat dan sukuk. Derivatif dagangan bursa juga mencatatkan rekod volum sebanyak 18.8 juta lot yang didagangkan. Bagaimanapun, penilaian keseluruhan yang lebih lemah mengakibatkan penurunan aset di bawah pengurusan (AUM) kepada RM906.5 bilion.

Pemerhatian yang berbeza ini mempamerkan keseimbangan yang halus antara memacu pertumbuhan dan mengadaptasi amalan berhemah ketika menghadapi situasi ketidaktentuan. Kepercayaan dan keyakinan yang berterusan dalam persekitaran pengumpulan dana dan pelaburan Malaysia bergantung pada cara elemen ini diuruskan oleh pihak berkepentingan pasaran.

Saya yakin bahawa ia penting untuk SC melibatkan diri dan berkomunikasi secara telus. Sesi dialog dan perundingan merupakan saluran yang bermanfaat untuk menetapkan jangkaan terhadap kedua-dua bidang kawal selia dan pembangunan. Penglibatan pelabur merupakan satu lagi aspek penting untuk memastikan pelabur yang berilmu dan berpengetahuan serta kurang terdedah kepada penipuan dan aktiviti tidak berlesen yang lain.

MENGALAKKAN TINGKAH LAKU PASARAN BERHEMAH

Daya tahan pasaran modal Malaysia yang berterusan menekankan nilai berhemah dan akauntabiliti bersama. Pendekatan ini membolehkan pasaran mengurus risiko dengan lebih baik, memelihara keseluruhan daya tahan dan kestabilan kewangan, serta menyokong pertumbuhan ekonomi.

Ia memerlukan pelaksanaan pengawasan berterusan dan penyeliaan audit, serta penilaian tematik ke atas pengantara dan institusi berlesen bagi memastikan keteguhan infrastruktur pasaran dan proses industri. Jika perlu, panduan

tambahan disediakan untuk risiko baru muncul termasuk menguruskan risiko alam sekitar, sosial dan tadbir urus (*environmental, social and governance* (ESG) bagi syarikat pengurusan dana (FMC).

Amalan dana institusi domestik diperkukuh pada 2022 dengan penerbitan prinsip tadbir urus yang baik untuk syarikat pelaburan berkaitan kerajaan (GLIC), selaras dengan objektif negara, dan *Malaysian Code for Institutional Investors 2022* (Kod Pelabur Institusi Malaysia (MCII 2022) yang dikemas kini. Syarikat awam tersenarai (PLC) juga dijangka mengambil kira risiko kemampunan mereka di bawah *Bursa Malaysia's Enhanced Sustainability Reporting Framework for Listed Issuers* (Rangka Kerja Pelaporan Kemampunan Dipertingkat Bursa Malaysia untuk Penerbit Tersenarai).

Di samping itu, SC akan kekal berwaspada dan mengambil tindakan tegas dalam menangani salah laku atau manipulasi pasaran. Pada 2022, tindakan penguatkuasaan kami meliputi antara lain dagangan orang dalam, pengeluaran kenyataan palsu dan aktiviti tidak berlesen. Lesen perantara juga telah dibatalkan sekiranya berlaku pelanggaran peraturan yang serius.

MEREALISASIKAN HASIL YANG PROGRESIF

Adalah penting bagi industri dan ekosistem pasaran kekal progresif dan proaktif selaras dengan perkembangan luar dan dalam negara. Sebagai penggubal dasar, SC perlu mengutamakan keadaan pasaran sedemikian, dengan memastikan rangka kerja kawal selia kami sejajar dengan landskap yang giat berubah.

Sorotan pembangunan utama pada 2022 termasuk penerbitan *Sustainable and Responsible Investment-Linked Sukuk Framework* (Rangka Kerja Sukuk Berkaitan Pelaburan Mampan dan Bertanggungjawab) dan *Principles-Based SRI Taxonomy for the Malaysian Capital Market* (Prinsip Taksonomi SRI bagi Pasaran Modal Malaysia (Taksonomi SRI) bagi merangsang peralihan korporat ke arah masa depan yang lebih hijau dan mampan. Garis panduan modal teroka (VC) dan ekuiti swasta (PE) yang dipertingkat untuk merangsang kerancakan dan kebolehcapaian pasaran swasta untuk perusahaan kecil dan sederhana (PKS), yang juga berkuatkuasa pada separuh kedua tahun tersebut. Di samping itu, SC telah mengeluarkan garis panduan nasihat pelaburan untuk mengembangkan kualiti dan kepelbagaian profesion, dengan nota teknikal mengenai nasihat pelaburan digital dalam menangani medium penyampaian baharu.

Inovasi teknologi juga telah mengubah struktur asas pasaran. Pada Oktober 2022, SC mengumumkan inisiatif berkaitan digital untuk pasaran modal, termasuk membenarkan platform pendanaan ramai ekuiti (ECF)

dan pembiayaan rakan setara (pembiayaan P2P) baharu dengan cadangan nilai yang unik, serta membuka peluang kepada pertukaran aset digital (DAX).

MELANGKAH KE HADAPAN

Tahun 2023 berkemungkinan akan menawarkan peluang, halangan dan risiko yang berbeza untuk pasaran modal. Persekitaran di hadapan dijangka mencabar, namun kami tetap komited untuk membina pasaran modal yang relevan, cekap dan pelbagai. Ini memerlukan langkah-langkah untuk memastikan asas infrastruktur pasaran kalis masa depan, serta mengukuhkan peranan pemikiran kepimpinan kami, sambil meningkatkan keluasan dan kedalaman pasaran serta penggunaan teknologi. Secara dalaman, SC juga akan berusaha ke arah memupuk budaya yang mampan dan berprestasi tinggi.

Membina Pasaran Modal Kalis Masa Depan

Untuk memastikan agar peraturan kami kekal wajar, kami berhasrat untuk memodenkan dua tonggak pengawalseliaan utama – *Akta Pasaran Modal dan Perkhidmatan 2007* (*Capital Markets and Services Act 2007* (CMSA) dan *Akta Suruhanjaya Sekuriti Malaysia 1993* (*Securities Commission Malaysia Act 1993* (SCMA)). Ini akan menyediakan asas pasaran modal Malaysia yang bersedia untuk masa hadapan.

Pada masa yang sama, pembangunan kumpulan profesional pasaran modal yang berkemahiran tinggi adalah penting untuk menangani sumber terhad yang menghalang kemajuan pasaran. Dalam hal ini, kami akan bekerjasama rapat dengan pihak berkepentingan industri untuk menjalankan Program Siswazah Pasaran Modal (CMGP) bagi memupuk dan mengekalkan bakat yang berpotensi.

Memajukan Agenda Kemampunan

Satu lagi keutamaan utama ialah dalam memajukan agenda ESG. Berikutan pengeluaran piawaian berkaitan penzahiran kemampunan global yang akan datang, adalah penting untuk membangunkan rangka kerja domestik bagi memudahkan penerimaan. Pihak SC berhasrat untuk bekerjasama rapat dengan kementerian kerajaan, agensi dan pihak berkepentingan lain untuk membentuk rancangan di peringkat negara, termasuk membangunkan ekosistem yang menyokong penzahiran kemampunan.

Selain itu, terdapat juga banyak potensi untuk dibuka dalam pasaran modal Islam (ICM) melalui penawaran produk inovatif yang memudahcara kemampunan, serta

bermanfaat dari segi sosial. Memandangkan kedudukan Malaysia sebagai bidang kuasa pemikiran kepimpinan Islam yang terkemuka, adalah penting untuk menunjukkan nilai objektif Syariah dalam meningkatkan amalan kemampanan. Kami sedang melalui proses pembentukan sebuah set prinsip *maqasid al-Syariah* (matlamat Syariah) yang komprehensif untuk menyediakan panduan laluan bagi pertumbuhan ICM selanjutnya. Perundingan pihak berkepentingan mengenai prinsip ini akan bermula hujung 2023.

Meningkatkan Keluasan dan Kedalaman Pasaran

Segmen pasaran swasta yang semakin meningkat akan menjadi kepentingan untuk pembinaan negara pada masa hadapan, terutamanya dalam menyalurkan modal berisiko untuk menyokong pertumbuhan perusahaan mikro, kecil dan sederhana (PMKS). Oleh itu, langkah mengukuhkan ekosistem pengumpulan dana alternatif bagi memudahcara jumlah pengumpulan dana yang lebih besar dan membina kapasiti khusus serta keupayaan akan dimulakan. Di samping itu, kemasukan platform ECF dan P2P baharu pada 2023 dijangka meningkatkan kepelbagaian produk pengumpulan dana alternatif dan perkhidmatan.

Dari segi pasaran awam, kami akan bekerjasama dengan Bursa Malaysia untuk memudahcara pemindahan syarikat yang layak daripada Pasaran LEAP ke Pasaran ACE.

Di samping itu, SC sedang menjalankan semakan dan penilaian menyeluruh terhadap pasaran awam serta segmen pasaran yang mantap seperti pengurusan dana ke arah meningkatkan daya tahan dan daya tarikan mereka.

Memudahcara Penggunaan Teknologi

Kami berhasrat untuk menyemak strategi Aset Digital kami dengan tujuan mengukuhkan cadangan dan hala tuju segmen ini. Inisiatif seperti Dana Inovasi Digital (*Digital Innovation Fund* (DIGID) dan *Islamic Fintech Accelerator Programme* (FIKRA) bertujuan sebagai pemangkin penggunaan teknologi kewangan yang lebih luas dalam ekosistem pasaran modal, dengan DIGID dijadualkan untuk mula membiayai kumpulan pertama penyelesaian kelayakannya pada 2023.

Bagi menyokong penggunaan teknologi, kami juga akan mengukuhkan pengurusan teknologi dan risiko siber oleh entiti pasaran modal.

Pada masa yang sama, inisiatif yang berterusan perlu dipertingkatkan untuk memperkasa pelabur runcit yang celik digital ke arah mengukuhkan perlindungan terhadap golongan yang lebih terdedah. Ini termasuk klinik digital bagi Golongan B40 dan warga emas, serta program untuk masyarakat luar bandar.

“

**Tahun 2023
berkemungkinan akan
menawarkan peluang,
halangan dan risiko
yang berbeza ke arah
membina pasaran modal
yang relevan, cekap dan
pelbagai.**


”

Membentuk Organisasi yang Berprestasi Tinggi

Adalah penting untuk SC sentiasa seiring dengan perubahan pesat dan kerumitan pasaran hari ini. Pengekalan bakat dan latihan juga penting untuk memastikan kami memenuhi piawaian tinggi seperti yang dikehendaki. Kad skor korporat sedang dibangunkan sebagai langkah pertama ke arah membentuk organisasi yang diiktiraf tinggi, mampan dan berprestasi tinggi. Ini akan dibantu dengan program penambahan nilai kemahiran dan pembelajaran untuk kakitangan bagi meningkatkan kecekapan.

Usaha juga sedang dijalankan untuk meningkatkan keupayaan dalam mengendalikan peralihan ke arah dunia digital. Ini termasuk peningkatan penggunaan teknologi dalam penyeliaan dan penguatkuasaan.

Sepanjang tahun pertama saya sebagai Pengerusi SC, saya berpeluang untuk bekerja dengan ahli-ahli Lembaga SC yang berpelbagai, berpengalaman dan berwawasan, berserta seluruh kakitangan SC. Terima kasih atas sokongan dan nasihat yang diberikan untuk memudahkan peralihan saya dalam memikul peranan ini. Sejurus SC mencecah 30 tahun pada 2023, saya yakin bahawa seluruh warga SC akan terus mempamerkan tahap dedikasi dan keteguhan seperti yang telah diberikan sepanjang tahun-tahun yang lalu. Digabungkan dengan sokongan padu dan kerjasama daripada peserta industri, pasaran modal Malaysia hanya boleh dibawa ke tahap yang lebih tinggi.



DATO' SERI DR. AWANG ADEK HUSSIN